

halben will ich ine ainem weisen Man inn die Ler geben, ine nach seines alters ergreiflichkeit zuunterrichten: will auch nichts daran sparen.

Auf solchs gleich inn frischer that also warm vnd hais, wie man die Pastetlin frist, schaft er im ainem grosen Sophistischn Supermagister, genant Herr Trubalt Holofernes, der vnser Strogenurgelchen sein Namenbüchlin, sein Abecetäflin, das gros Lerpret, damit Hercules seinen Lermaister Linum todschlug, gar bald leret, 40 das ers im sinn inn vnd auswendig, hinderlich vnd fürsich kont, wie die Segmüller. Vnd inn solchem Läswerk vnd Schreibbüchlin üben pracht er fünf jar vnd trei Monat zu. Darnach leret er in den Donat, den Facet, Theodolet vnd Alanum inn Parabolis, vnd verzeret 13 Jar, sechs Monat vnd zwen darmit: Dan wer reden will lernen, mus for stamlen lernen, Juxta illud: minorans se maiorabitur, der klainst mus den grössten dinen. Hizwischen solt ir aber auch wissen, das er die Gottische Schrift hat lernen schreiben, wie deren Exempel etlich Lazius vnd Goropius zaigen. Er schrib auch alle Bücher, dan die Truckerkunst war noch nit aufkommen, der Gutenberger zu Strasburg 50 vnd die Schäfer von Menz warn noch in Lumpis Abraham: Drum trug er allzeit ain grosen wüsten schreibzeug vnd penal, welcher wag siben tausent quintal nach Benedischem gewicht zu Rörnberg gelisfert, vnd das Calamar war so gros vnd dick, als der gros Pfeiler zu Enach vnd der gegossenen Seulen aine in der Abtei zu Schafhausen: daneben hing an ainer dicken Fallpruckketten ain dintenhorn, welchs so vil hilt als die Bambergische Prutteffel. Nachgehends lert er ine aine schöne Namenclatur vnd sprachserklärung . . .

Demnach zu förderung zu höhern Künsten las er im de modis significandi, mit den Commenten des Hurtebize, des Faswins, des 60 Troppisfel, des Galehalts, des Jan Kalben, des Billoni, des Breligandi, vnd ain duzend anderer meher Fronstastengeltfammeler vnd Lochsegende Ruten-König im Birkenwald. Behart auch inn disem stuch der ler beinah 18 Jar vnd ailsf Monat: vnd wußts so wol, das ers im copulat kont hinder sich vnd für sich prauchen wie die Pragische Würfel. Ja wußt auf aim nägelin das de modis significandi non erat scientia, vnd wa defectuositas sei cervelli oder rationum, das man Captivitatem rationis soll einwenden. Dan wußt irs nit, Rubrum compositum haist ain Rubengompst.

Auch gab er im auf zu lernen baide Partes für die Tabulisten 70 vnd Contonisten. Es tu Scholaris? Sum Scholaris vere, si non vis credere, quere. Sum quae pars? etc. Waßer kompt Volo? Vom Griechischen Benjamin, das Wein inn vo vnd Jam inn lo, vnd